

西樓文編卷一

西樓記

昆明城中有山曰五華。其麓窪然成澤。約廣百畝。是為翠湖。有堤通湖南北。樹陰交翳。當堤之北。折小橋過竹裏。見窗隱隱。是為西樓。乙丑初秋。余自校退。受師之命。來樓居焉。樓內橫榻兩案對之。旁置經史百卷。暇日披讀。欣然忘倦。外則茂林環池。間種桃梅。歲交花放。鮮映池亭。古柯一株。枝曲如爪。宜鷺下集。矯首展翼。余見亦喜。遙望故校。屏列林表。青山為阻。不

覺悵然。每念既望之夜。獨倚窗左。餞暮雲。待明月。月出歎曰。先居樓者不為志。後居樓者復何識。見月空爾為樓。亦未有名。是貽樓之愧。且題之曰西樓。非樓位於西。蓋西宜望月也。故為之記。時丙寅歲正月十八日也。

游鐵峯庵記

去昆明城北十里。有鐵峯庵焉。峯長虹山右臂也。東嚮望之。勢突兀。而蒼黑。丙寅正月二十三日。楊君符君與余游。路崎嶇。越坡壠數。仰見庵據巔。至攀石級。

登殿三崇。最高曰準提。中途所覩也。因勢鑿崖。磴埒成。與下二崇異。神祀觀音。自左出。有洞穿石如扉。不數武。與原徑合。依崖多題名。不古。扶檻可望數百里。滇池滌西山如練。塔高可指。俯視丘垤。傾陷近前如盤。樹鬱鬱。時花惟桃李。竹竿長丈餘。大者徑寸。杪無葉。或曰樵取也。初入庵。僧淪茗進。將歸復飲。余顧僧貧。問庵有廩乎。答曰無。何故。曰清亡後。興學者并之也。同游聞為之愴然。歸避游卒。尋左谷出。路較平。而遠近與去等。明日記。

旅行富民記

余以丁卯正月三日。應廖君新學之招。旅行富民。其地位於省垣西北。行一日至。沿途山川映發。良多佳趣。城內大街一城。南三之。將入南門。有橋橫江。長二十丈。橋曰永定。用木建。江為螳螂。入長江。橋底以房。兩側列櫃。三日一場。商賈藉之為市。飯後攜侶。閒步橋上。遠觀山耳。聽流楊柳婆娑。翔鳥左右。城北三里。羣峭連天。長林布野。有寺曰飛來。峙於孤峯之上。登覽全境。尤難離懷。折而西南。山益複。樹益茂。村寨益